

Douna

To atséradā ēš mažiausē grūdelē
I minkšta žemē numesta.
Prasidiejē ēš mēnka daigelē
Pagērdīta lītaus ē saulēs apšvēista.

Ramē mēiguojē žēimuos mēigo,
Iškēntiejē pūgas ēr šalti.
Ateisi skani ont stala To,
Kad mes galietomem gīventē.

Par vasara krūmūs gegožie kokava,
Linkiejē, kad augtum ē kēltum aukštīn.
Tava plaukā kap jūra bangava –
Sunkēs varpas svēra žemīn.

Pernešē ēr mašinu triukšma,
Skalsuos ēr stiprībēs linkiejē gondrā.
Artuojou soteikē neapsakuoma džiaugsma,
Ka ē klieti gausē pabērā...

Douna mūsa brongi, kasdēinēnē
Gol ont stala dailē soraikīta.
Douna ēaug ē kūna ēr krauji,
Sūraus prakaita apšlakstīta...